

यूहन्ना की पहली पत्त्री यूहन्ना अन्द पयला चट्ठी परचिय

१ यूहन्ना अन्द चट्ठी प्रेरति यूहन्ना अन्द द्वारा मसीह अन्द जनम इन ५० से १०० साल इन न्याड्या दा लखिसकु आगीत. यूहन्ना खुद इक लेखक इन रूप दा जानसालुन. लेकीन पयला अध्याय तोरसतद की आव यीशु उन जीवन अदकि पुनरूत्थान इन साटी ऊंद प्रत्यक्षदर्शी आन १:१-३ पयला यूहन्ना दा लेखन शैली यूहन्ना अन्द अनुसार खुशखबरी दा सकिद लेखन शैली घाई काळसतद. हगि मान्सकु आगतद की १ यूहन्ना अन्द चट्ठी इन अनुसार खुशखबरी लखिसीदुन अदकि इफसिस दा ईरतेला मुर चट्ठी १ यूहन्ना, २ यूहन्ना अदकि ३ यूहन्ना ईरव.

यूहन्ना ई चट्ठी इक सप्पा इसाई लॉकुरी लखिसीदुन याग मंडली इक “ग्यानवादी” हेसुर इनोर लॉकुर इन समुह देल परेशानी आगोद. ई लॉकुर मान्स तोगोर की यीशु पुरा तरीका देल परमेश्वर ईरोन लेकीन आव सही दा पृथ्वी मा मास अदकि रक्ता अन मय इन सांगुळ मळसा ईला ईरोन. ईदा कारण यूहन्ना यीशु उन जीवन इन प्रती प्रत्यक्षदर्शी आगोद बारा दा लखिसदुन अदकि अंदुन की आऊन कयगोळ यीशु उक मुटदव १:१-३. ई चट्ठी इक लखिसदुर दा यूहन्ना अन्द उद्देश आंदुर खुशी इक पुरा माळोद ईरोद १ यूहन्ना १:४, वशिवासीगोळी पाप माळदुर देल रोकसोर साटी १ यूहन्ना २:१, ख्वाटा शकिषा देल वशिवासीगोळद रक्षा माळोर साटी १ यूहन्ना २:२६ अदकि वशिवासीगोळी आश्वस्त माळोद की आंदुर ऊळसकु आग्यार. ५:१३

रूप-रेखा

१. यूहन्ना तान चटिठी प्रस्तुत माळदुन अदकि इदरी लखिसोद ऊंद उद्देश कोट्टुन. १:१-४
२. बाक आव समझुसतान की परमेश्वर हयांग ऊजुळ आन अदकि नामी जीवन स्वरूप ईरली पायजे. १:५-३:१०
३. इदुर बाददा आव नामी आबुर दाबुर से प्यार माळोद आदेश इन याद तोरसतान. ३:११-५:१२
४. आव तान चटिठी खतम माळतान. ५:१३-२१

जीवन इन बातणी

1 ✨आ जीवन इन वचन इन बारा दा जो पयले टु ईरोद. यदरी नाव केळेव, अदकि यदरी तान कण्णगोळ देल नोळदेव, उलटा यदरी नाव ध्यान देल नोळदेव अदकि कयगोळ देल मुटदेव. 2 ✨ईद जीवन प्रगट आत्त, अदकि नाव आऊक नोळदेव, अदकि आऊन गवाही कोळतेव, अदकि नीमी आ अनन्त जीवन इन समाचार कोळतेव जो आप्प उन सांगुळ ईरोन अदकि नाम मा प्रगट आदुन. 3 जो येनारा नाव नोळेव अदकि केळेव अदुरद समाचार नीमी भी कोळतेव, इदुरसाटी की नीव भी नाम सांगुळ सहभागी आगी; अदकि नाम्द ईद सहभागीता आप्प उन सांगुळ अदकि आऊन पार यीशु मसीह अन सांगुळ आद. 4 अदकि ई मातगोळ नाव इदुरसाटी लखिसतेव की नाम्द खुशी पुरा आगेगुल.

प्रकाश दा नळोद

5 जो समाचार नाव आऊन से केळेव अदकि नीमी केळसतेव, अद ईद हुन की परमेश्वर प्रकाश हुन अदकि आऊन दा येनु उच अंधकार हैलेच. 6 अगर नाव अंदेव की आऊन सांगुळ नाम्द सहभागीता आद अदकि मात्त पाप दा नळदेव, रा नाव खाटा

आयेव अदकि सच्चाई मा नळालेव; ⁷ लेकीन अगर ह्यांग आव प्रकाश दा आन, हांग अच नाव भी प्रकाश दा नळदेव, रा आबुर दाबुर से सहभागीता ईटतेव, अदकि आऊन पार यीशु उन रक्ता नामी सप्पा पापगोळ देल शुद्ध माळतद.

⁸ अगर नाव अंदेव कनि नाम दा येनु भी पाप ईल्लच, रा तान तान इक ध्वाका कोळतेव, अदकि नाम दा सच्चाई ईल्लच. ⁹ अगर नाव तान पापगोळी मान्स कोंडेव, रा परमेश्वर नामव पापगोळ इक माफ माळोद अदकि नामी सप्पा पापगोळ देल शुद्ध माळदुर दा वशिवासलायक अदकि न्यायी आन. ¹⁰ अगर नाव अंदेव कनि नाव येनु पाप माळीदलि, रा परमेश्वर उक ख्वाटा टहूरसतेव, अदकि आऊन वचन नाम दा हैलेच.

2

मसीह नामव सहायक

¹ हे नान चकिोरगोळा, ना ईव मातगोळ नीमी इदुरसाटी लखिसतीन कनि नाव पाप माळबाळी; अदकि अगर यावारा पाप माळतान, रा आप्प उन हात्ती नामव ऊंद सहायक आन, मतलब न्यायी यीशु मसीह; ² अदकि आवा नामव पापगोळ इक माफ माळतान, अदकि उलटा नाम्द अच ईला बल्की पुरा दुनयिया अन पापगोळ्द भी.

³ अगर नाव परमेश्वर उन आग्यागोळ इक मान्सतेव, रा इदुर देल नाव जान्स कोंडेव कनि नाव आऊक जान्सगेव. ⁴ जो यावारा ईद अनतान, “कनि नाव आऊक जान्स कोंडीन,” लेकीन आऊन आग्यागोळ इक मान्सालुन, रा आव ख्वाटा आन अदकि आऊन दा सच्चाई ईल्लच; ⁵ पर जो यावारा आऊन आग्यागोळ मा नळुतान, आऊन दा खराखुरा परमेश्वर उन प्यार सदिध आग्याद. इदुर देल नाव जान्सतेव कनि नाव परमेश्वर उन संगती दा ऊंद आयेव: ⁶ जो यावारा ईद अनतान कनि ना आऊन दा बनसकु

ईरतीन, आऊक पायजे क खिद भी हांग अच नळुल ह्यांग आव नळुतोगोन.

व्हाशोद आग्या

7 *हे प्रयि, ना नीमी यातोदु व्हाशोद आग्यागोळ लखिसालीन, पर अदा हाळोद आग्या जो पयले टु नीमी सकियाद; ईद हाळोद आग्या अद वचन हुन यदरी नीव केळीर. 8 तरी भी ना नीमी व्हाशोद आग्यागोळ लखिसतीन, अदकि ईद अदुर दा अदकि नीम दा सही ठहरूसतद; यतकी अंधकार खतम आगोगतद अदकि सच्चाई इन प्रकाश ईग चमकुस्ली हत्याद.

9 जो यावारा ईद अनतान क ना प्रकाश दा आईन अदकि आव तान मसीह वार्ट से दुश्मनी ईटतान, आव ईगासताका अंधकार दा अच आन. 10 जो यावारा तान मसीह वार्ट से प्यार ईटतान आव प्रकाश दा ईरतान, अदकि आव यारदु ठोकर इन कारण बन्स सकालुन. 11 पर जो यावारा तान मसीह वार्ट से दुश्मनी ईटतान आव अंधकार दा आन अदकि अंधकार दा नळुतान, अदकि जानसालुन क याता जागा दा होगेत्यान, यतकी अंधकार आऊन कण्णगोळी कुढढ माळबुटाद.

12 हे चकिोरगोळा, ना नीमी इदुरसाटी लखिसतीन क आऊन हेसुर देल नीम पाप माफ आग्याव. 13 हे आप्पगोळा, ना नीमी इदुरसाटी लखिसतीन क जो पयले टु आद नीव अदरी अरूतीर. हे हारोदोरा, ना नीमी इदुरसाटी लखिसतीन क नीव आ दुष्ट मा जय हासलि माळीर. हे पारगोळा, ना नीमी इदुरसाटी लखिसतीन क नीव आप्प उक जान्स कोंडीर.

14 हे चकिोरगोळा, ना नीमी इदुरसाटी लखिसतीन क जो पयले टु आद नीव अदरी जान्स कोंडीर. हे हारोदोरा, ना नीमी इदुरसाटी लखिसतीन क नीव ताकतवर आईर, अदकि परमेश्वर उन वचन

नीम दा बन्सकु ईरतद, अदकि नीव आ दुष्ट मा जय हासलि माळीर.

15 नीव ना रा दुनया से अदकि ना दुनया अन्द वस्तुगोळ से प्यार ईटी. अगर यावारा दुनया से प्यार ईटतान, रा आऊन दा आप्प उन प्यार हैलेच. 16 यतकी जो येनारा संपत्ती दुनया दा आद, मतलब मय इन अभलिषा अदकि कण्णगोळ्द इच्छा अदकि जीव इन घमण्ड, अद आप्प उन दी टु ईला लेकीन दुनया दी टु उच आद. 17 पुरा दुनया अदकि अदुरद अभलिषागोळ येद्धु मट्टुसेगताव, लेकीन जो परमेश्वर उन इच्छा मा नळुतान आव हमेशा बन्सकु ईततान.

मसीह-वरीधी

18 हे पारगोळा, ईद आखरी समय आद; अदकि ह्यांग नीव केळीर कि मसीह अन्द वरीधी बरावाळा आन, अदुर अनुसार ईग भी हापाळ सा मसीह-वरीधी यदकु नदिर्यार; इदुरसाटी नाव जान्सतेव किईद आखरी समय हुन. 19 आंदुर होटार भी रा नाम दा टु उच, लेकीन नाम दा टु ईला ईरोर; यतकी अगर आंदुर नाम दा टु ईरायदुर रा नाम सांगुळ ईरायदुर; लेकीन होटकु इदुरसाटी होदुर किईद प्रगट आगुल कि आंदुर सप्पा मुंदुर नाम दा टु आल्लच.

20 लेकीन नीम्द रा आ पवत्रि आत्मा देल अभषिक आग्याद, अदकि नीव सप्पा येनारा जान्सतीर. 21 ना नीमी इदुरसाटी लखिसदिलि कि नीव सच्चाई इक जान्सालीर, लेकीन इदुरसाटी कि आऊक जान्सतीर, अदकि इदुरसाटी कि यातोदु भी ख्वाटा वस्तु, सच्चाई दी टु हैलेच.

22 ख्वाटा याव आन? सर्फि आव जो यीशु उन मसीह ईरोद से इनकार माळतान; अदकि मसीह अन्द वरीधी आवा हुन, जो आप्प उन अदकि पार उन इनकार माळतान. 23 जो यावारा पार उन इनकार माळतान आऊन हात्ती आप्प भी हैलेच: जो पार उक मान्स कोमतान, आऊन हात्ती आप्प भी आन.

24 जो येनारा नीव पयले टु केळीर, अदा नीम दा बन्सकु ईरूल; जो नीव सुरू टु केळीर, अगर अद नीम दा बन्सकु ईरूल रा नीव भी पार दा अदकि आप्प उन दा बन्सकु ईत्तीर. 25 अदकि यदुर्द आव नाम से वादा माळदुन अद अनन्त जीवन हुन.

26 ना ई मातगोळ नीमी आ लॉकुर बारा दा लखिसतीन, जो नीमी बैकुसतार; 27 लेकीन नीमद अद अभषिक जो आऊन दी टु माळकु आतत, नीम दा बन्सकु ईरतद, अदकि नीमी इदुर्द जरवत ईला क्वावारा नीमी कलसुल, उलटा ह्यांग अद अभषिक जो आऊन दी टु माळकु आत नीमी सप्पा मातगोळ कल्सतद, अदकि ईद सही आद अदकि ख्वाटा हैलेच; अदकि ह्यांग आव नीमी कलस्यान हांग अच नीव अदुर्दा बन्सकु ईरतीर.

28 इदुरसाटी हे चकिोरा, अदुर्दा बन्सकु ईरी क्वायाग आव प्रगट आदान रा नाम दा हम्मित ईरूल, अदकि नाव आऊन बंदुर मा आऊन मुंद नाचकतदिलि. 29 अगर नीव जान्सतीर, क्वा आव न्यायी आन, रा ईद भी जान्सतीर क्वा जो यावारा न्याय इन क्वालसा माळतान आव आऊन से पैदा आग्यान.

3

परमेश्वर उन चकिोर

1 *नोळी, आप्प नाम से ह्यांग प्यार माळकु कारदुन क्वा नाव परमेश्वर उन औलाद अंदकु आदेव; अदकि नाव आयेव भी. ईद कारण दुनया नामी अराल, यतकी आव आंदरी भी अरतीदलि. 2 हे प्रयि संगीगोळा, ईग नाव परमेश्वर उन औलाद आयेव, अदकि ईगासताका ईद प्रगट आगीदील क्वा नाव अदकि येन आदेव! ईट जान्सतेव क्वायाग प्रगट आदीत रा नाव आऊन घाई आदेव, यतकी आऊक हांग अच नोळेव ह्यांग आव आन. 3 अदकि जो यावारा मसीह मा ईद आशा ईटतान, आव तान तान इक हांगा शुद्ध माळतान ह्यांग मसीह शुद्ध आन

4 जो यावारा पाप माळतान, आव व्यवस्था अन्द वरिध माळतान; अदकि पाप रा व्यवस्था अन्द वरिध हुन. 5 *नीव जान्सतीर कि आव इदुरसाटी प्रगट आदुन कि पापगोळी तेगद बुळुल; अदकि आऊन स्वभाव दा पाप हैलेच. 6 जो यावारा आऊन एकता दा बन्सकु ईरतान, आव पाप माळालुन: जो यावारा पाप माळतान, आव ना रा आऊक नोळ्यान अदकि ना आऊक जानस्यान.

7 हे चकिरा, यारदारा बैकावा दा बरबाळेतीर. जो न्याय इन क्याल्सा माळतान, आव अच आऊन घाई आन. 8 जो यावारा पाप माळतान आव शैतान दी टु आन, यतकी शैतान पयले टु उच पाप माळत बंदान. परमेश्वर उन पार इदुरसाटी प्रगट आदुन कि शैतान उन क्याल्सागोळद नाश माळकु छुटकारा कोळुल.

9 जो यावारा परमेश्वर उन से पैदा आग्यान आव पाप माळालुन; यतकी आऊन स्वभाव दा बन्सकु ईरतान, अदकि आव पाप माळ अच सकालुन यतकी आव परमेश्वर देल पैदा आग्यान. 10 इदुर देल अच परमेश्वर उन औलाद अदकि शैतान उन औलाद अरूकु आगतद; जो यावारा न्याय इन क्याल्सा माळालुन आव परमेश्वर देल पैदा आगीदील, अदकि ना आव जो तान मसीह वार्ट से प्यार ईटालुन.

आबुर दाबुर से प्यार ईटी

11 *यतकी जो समाचार नीव पयले टु केळीर, अद ईद आग्या हुन कि नाव आबुर दाबुर से प्यार ईटटेव; 12 अदकि कैन उन घाई बन्सबाळी जो आ दुष्टगोळ दा टु ईरोन, अदकि याव तान मसीह वार्ट उक कोंद बुट्टुन. अदकि आऊक याता कारण देल कोंद बुट्टुन? ई कारण कि ईऊन क्याल्सा बुरा ईरव, अदकि आऊन क्याल्सा न्याय इनव ईरव.

13 हे मसीह वार्ट अदकि आकतींगेरा, अगर दुनया नीम से दुश्मनी माळतद रा अचम्भा माळबाळी. 14 *नाव जान्सतेव क्नि नाव मृत्यु टु पार आगकु जीवन दा प्रवेश माळेव; यतकी नाव मसीह वार्टुर से प्यार ईटतेव. जो प्यार ईटालुन आव मृत्यु उन दशा दा ईरतान. 15 जो यावारा तान मसीह वार्ट से दुश्मनी ईटतान, आव हत्यारा हुन; अदकि नीव जान्सतीर क्नि यावारा हत्यारा दा अनन्त जीवन ईराल्द. 16 नाव प्यार ईदुर देल अच जान्सदेव क्नि आव नाम साटी तान जीव कोट बुट्टुन; अदकि नामी भी खुद मसीह वार्ट अदकि आकतींगेर साटी जीव कोळ पायजे. 17 लेकीन जो यारदारा हात्ती दुनया अन्द संपत्ती ईरूल अदकि आव तान मसीह वार्ट उक कंगाल नोळकु आऊन जरवत मा तरस तनीद चाहासालुन, रा आऊन दा परमेश्वर उन प्यार ह्यांग बनसकु ईर सकतद? 18 हे चकिोरा, नाव वचन अदकि ल्यालग्या देल अच ईला, लेकीन क्याल्सा अदकि सच्चाई अन्द द्वारा भी प्यार ईटटेव.

परमेश्वर उन हात्ती हमिमत

19 इदुर देल अच नाव जान्सेव क्नि नाव सच्चाई नव हुयेव; अदकि याता मात दा नाम मन नामी दोष कोट्टीत, अदुर बारा दा नाव परमेश्वर उन मुंद आत्मवश्वास देल ईत्तेव; 20 यतकी परमेश्वर नाम मन देल हापाळ धोड्डेव आन, अदकि सप्पा येनारा जान्सतान. 21 हे प्रयि संगीगोळा, अगर नाम मन नामी दोष कोळाल, रा नामी परमेश्वर उन मुंद हमिमत ईरतद; 22 नाव आऊन से जो येनारा बेळतेव, अद नामी आऊन हात्ती टु सकितद, यतकी नाव आऊन आग्यागोळ इक मान्सतेव अदकि जो आऊक वळ्लीद हततद अदा माळतेव. 23 *आऊन आग्या ईद आद क्नि नाव आऊन पार यीशु मसीह अन्द हेसुर मा वश्वास माळेव, अदकि ह्यांग आव नामी आग्या कोटान आऊंदा अनुसार

आबुर दाबुर दा प्यार ईट्टेव. 24 जो परमेश्वर उन आग्यागोळ इक मान्सतान, आव परमेश्वर दा अदकि परमेश्वर आंदुर दा बन्सकु ईरतान: अदकि इदुर देल अच, मतलब आ आत्मा देल जो परमेश्वर नामी कोटान, नाव जान्सतेव कऱि परमेश्वर नाम दा बन्सकु ईरतान.

4

आत्मागोळद परख माळी

1 हे प्रयि संगीगोळा, हर ऊंद आत्मा अन्द विश्वास माळबाळी, उलटा आत्मागोळद परख माळी कऱि अव परमेश्वर दी टु हुव का आल्लच; यतकी हापाळ सा ख्वाटा भवषियवक्तागोळ दुनया दा होटकु नदिरकु आर. 2 परमेश्वर उन आत्मा नीव ईदा रीर्ता देल जान्स सकतीर: जो आत्मा मान्स कोमतद कऱि यीशु मसीह मय दा टु आगकु बंदान आव परमेश्वर उन दी टु हुन, 3 अदकि जो आत्मा यीशु मसीह इक मानसाल, अद परमेश्वर उन दी टु आल्लच; अदकि अदा रा मसीह अन वरीधी इन आत्मा हुन, यदुर्द चर्चा नीव केळ कोंडीर कऱि आव बरावाळा आन, अदकि ईग भी दुनया दा आन. 4 हे चकिरा, नीव परमेश्वर नोर हुईर, अदकि नीव आ आत्मागोळ मा जय हासलि माळीर; यतकी जो नीम दा आद अद आऊन से जो दुनया दा आन, महान आन. 5 आंदुर दुनया नोर आर, ई कारण आंदुर दुनया अन मातगोळ माताळतार, अदकि दुनया आंदुरद केळतद. 6 नाव परमेश्वर उन हुयेव. जो परमेश्वर उक जान्सतान, आव नाम्द केळतान; जो परमेश्वर उक जान्सालुन आव नाम्द केळालुन. ई प्रकार नाव सच्चाई इन आत्मा अदकि भरम इंद आत्मा अक अर्त कोमतेव.

परमेश्वर प्यार हुन

7 हे प्रयि, नाव आबुर दाबुर दा प्यार ईट्टेव, यतकी प्यार परमेश्वर से आद, जो यावारा प्यार माळतान, आव परमेश्वर से पैदा आग्यान अदकि परमेश्वर उक जान्सतान. 8 जो प्यार ईटालुन आव परमेश्वर उक जान्सालुन, यतकी परमेश्वर प्यार हुन. 9 जो प्यार परमेश्वर नाम से ईटतान, अद ईदुर देल प्रगट आग्याद कि परमेश्वर तान ऊंद ठैसा पार उक दुनयिा दा कळ्यान कि नाव आऊन द्वारा जीवन प्राप्त माळेव. 10 प्यार इदुर दा हैलेच कि नाव परमेश्वर से प्यार माळदेव, लेकीन इदुर दा आद कि आव नाम से प्यार माळदुन अदकि नाम पापगोळ्द माफ अन साटी तान पार उक कळुदुन.

11 हे प्रयि, याग परमेश्वर नाम से हगि प्यार माळदुन, रा नामी भी आबुर दाबुर दा प्यार ईट पायजे. 12 ✨परमेश्वर उक याऊ यागलु नोळीदील; अगर नाव आबुर दाबुर दा प्यार ईट्टेव, रा परमेश्वर नाम दा बन्सकु ईरतान अदकि आऊन प्यार नाम दा सद्धि आग्याद.

13 इदुर देल अच नाव जान्सतेव कि नाव आऊन दा बन्सकु ईरतेव, अदकि आव नाम दा; यतकी आव तान आत्मा नामी कोटान. 14 नाव नोळ भी कोण्डेव अदकि गवाही कोळतेव कि आप्प पार उक दुनयिा दा उद्धारकर्ता माळकु कळ्यान. 15 जो यावारा ईद मान्स कोमतान कि यीशु परमेश्वर उन पार हुन, परमेश्वर आऊन दा बन्सकु ईरतान, अदकि आव परमेश्वर दा

16 जो प्यार परमेश्वर नाम से ईटतान, अदरी नाव जान्स कोडेव अदकि नामी आऊन वश्वास आद. परमेश्वर प्यार हुन, अदकि जो प्यार दा बन्सकु ईरतान आव परमेश्वर दा बन्सकु ईरतान, अदकि परमेश्वर आऊन दा बन्सकु ईरतान. 17 इदुर देल अच प्यार नाम दा सद्धि आग्याद कि नामी न्याय इन दशी हम्मिमत ईरूल; यतकी ह्यांग मसीह आन हांग अच दुनयिा

दा नाव भी आवेव. 18 प्यार दा अंज्क ईराल, उलटा सदिध प्यार अंज्क इक दुर माळ बुळतद; यतकी अंज्क इन संबध दण्ड देल ईरतद, अदकि जो अंज्क ईटतान आव प्यार दा सदिध आगीदील.

19 नाव इदुरसाटी प्यार माळतेव, कि पयले आव नाम से प्यार माळदुन. 20 अगर यावारा अंदान, “ना परमेश्वर से प्यार ईटतीन,” अदकि तान मसीह वार्ट से दुश्मनी ईटुल रा आव ख्वाटा आन; यतकी जो तान वार्ट से यारी आव नोळ्यान प्यार ईटालुन, रा आव परमेश्वर से भी यारी आव नोळीदील प्यार माळालुन. 21 आऊन से नामी ईद आग्या सकियाद, कि जो यावारा परमेश्वर से प्यार ईटतान आव तान मसीह वार्ट से भी प्यार ईटुल.

5

दुनया मा जय हासलि माळोद

1 यार्द ईद वशिवास आद कि यीशु अच मसीह हुन, आव परमेश्वर से पैदा आग्यान; अदकि जो यावारा पैदा माळावाळा से प्यार ईटतान, आव आऊन से भी प्यार ईटतान जो आऊन से पैदा आग्यान. 2 याग नाव परमेश्वर से प्यार ईटतेव अदकि आऊन आग्यागोळ इक मान्स्तेव, रा इदुर देल अच नाव जान्स्तेव कि नाव परमेश्वर उन औलादगोळ से प्यार ईटतेव. 3 *यतकी परमेश्वर से प्यार ईटोद ईद हुन कि नाव आऊन आग्या अक मान्सेव; अदकि आऊन आग्यागोळ कठनि हैलेच. 4 यतकी जो येनारा परमेश्वर देल पैदा आग्याद, अद दुनया मा जय हासलि माळतद; अदकि अद वजिय यदुर देल दुनया मा जय हासलि आगतद अदा नाम वशिवास हुन. 5 दुनया मा जय हासलि माळावाळा याव हुन? सर्फ आव यार्द ईद वशिवास आद कि यीशु, परमेश्वर उन पार हुन.

* 5:3 ५:३ यूहन्ना १४:१५

यीशु मसीह अन्द बारा दा गवाही

6 ईवा हुन आव जो नीर अदकि खुन अन द्वारा बंदीदुन, मतलब यीशु मसीह: आव सर्फि नीर इन द्वारा ईला लेकीन नीर अदकि रक्ता येदु चजि इन द्वारा बंदीदुन ईद गवाही सच्चाई हुन. 7 अदकि जो गवाही कोळतद, अद आत्मा हुन; यतकी आत्मा सच्चाई आद. 8 गवाही कोळावाळा मुर आव, आत्मा, अदकि नीर, अदकि रक्ता; अदकि मुर ऊंदा मात मा सयमत आव. 9 याग नाव मंळसागोळ्द गवाही मान्स कोमतेव, रा परमेश्वर उन गवाही रा अऊर से वाळुसकु आद; अदकि परमेश्वर उन गवाही ईद आद कजि आव तान पार उन बारा दा कोटान. 10 जो परमेश्वर उन पार मा वश्वास माळतान आव तान मन दा अच गवाही ईदतान. याव परमेश्वर मा वश्वास माळीदलि आव आऊक खाटा ठहूसदुन, यतकी आव आ गवाही मा वश्वास माळीदलि जो परमेश्वर तान पार उन बारा दा कोटान. 11 *अदकि अद गवाही ईद हुन कजि परमेश्वर नामी अनन्त जीवन कोटान, अदकि ईद जीवन आऊन पार उन दा आद. 12 यार हात्ती पार आन, आऊन हात्ती जीवन आद, अदकि यार हात्ती परमेश्वर उन पार हैलेच, आऊन हात्ती जीवन भी हैलेच.

अनन्त जीवन

13 ना नीमी, जो परमेश्वर उन पार उन हेसुर मा वश्वास माळतीर, इदुरसाटी लखिसतीन कनीव अर्त कोमी कजि अनन्त जीवन नीम्द आद. 14 अदकि नामी आऊन मुंद जो हम्मिमत सकितद, अद ईद हुन; कजि अगर नाव आऊन इच्छा अन्द अनुसार येनारा बेळतेव, रा आव नाम केळतान. 15 याग नाव जो येनारा आऊन से बेळतेव आव नाम केळतान, रा ईद भी जान्सतेव कजि जो येनारा नाव आऊन से बेळदेव, आव कोळतान.

16 अगर यावारा तान मसीह वार्ट उक हगि पाप माळतेला नोळुल यदुर्द अंजाम मृत्यु आगाल, रा वनिती माळकु बेळुल, अदकि परमेश्वर आऊक आंदुर साटी, यार हगि पाप माळ्यार यदुर्द अंजाम मृत्यु आगाल, जीवन कोटान. पाप हगि भी आगतद यदुर्द अंजाम मृत्यु आगतद; इदुर बारा दा ना वनिती माळोर साटी हेळालीन. 17 सप्पा प्रकार इन अन्याय रा पाप हुन, लेकीन हगि पाप भी आद यदुर्द अंजाम मृत्यु आल्लच.

18 नाव जान्सतेव, कि जो यावारा परमेश्वर उन से पैदा आग्यान, आव पाप माळालुन; लेकीन जो परमेश्वर से पैदा आग्यान, आऊक आव ऊळ्सकु ईटतान, अदकि आ दुष्ट आऊक मुट सकाल.

19 नाव जान्सतेव कि नाव परमेश्वर से आयेव, अदकि सप्पा दुनिया आ दुष्ट उन वश दा बदिक् आद.

20 नाव ईद भी जान्सतेव कि परमेश्वर उन पार होट बंदान अदकि आव नामी समझ कोटान कि नाव आ सही परमेश्वर उक अरतेव; अदकि नाव अदुर दा जो सच्चाई आद, मतलब आऊन पार यीशु मसीह दा ईरतेव. खरा परमेश्वर अदकि अनन्त जीवन ईदा हुन.

21 हे चकिरा, तान तान इक मूर्तीगोळ देल ऊळ्सकु ईटी.

परमेश्वर उन खरा वचन

**The Holy Bible in the Holiya language of India: परमेश्वर
उन खरा वचन**

copyright © 2020 The Word for the World International

Language: Gohllaru (Holiya)

Contributor: The Word for the World International

परमेश्वर उन खरा वचन
व्हाशेद नयिम, 2020

The New Testament in Holiya Language

The Word for the World International

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

3943f9d0-5b35-54ad-8e8f-1b7bf74924c6